

# 'Dapatan dalam laporan PAC untuk perbaiki tadbir urus universiti' - Zambry

Oleh TUAN BUQHAIRAH TUAN MUHAMAD ADNAN 16 Julai 2024 07:15pm [Masa membaca: 4 minit](#)



Datuk Seri Dr Zambry Abd Kadir. Foto Bernama

CYBERJAYA - Kementerian Pendidikan Tinggi (KPT) mengalu-alu cadangan Jawatankuasa Kira-Kira Wang Negara (PAC) agar mempertimbangkan pelaksanaan Garis Panduan Pelaburan dan Pembiayaan oleh Universiti Awam 2024 kepada anak-anak syarikat di bawah seliaan Kementerian itu.

Menterinya, Datuk Seri Dr Zambry Abd Kadir berkata, sebarang dapatan dalam laporan PAC adalah untuk memperbaiki tadbir urus universiti.

"Kita alu-alukan kerana paling mustahak ialah sebarang dapatan yang ada dalam laporan PAC itu bertujuan untuk memperbaiki tadbir urus universiti tertakluk kepada laporan itu," katanya.

Beliau berkata demikian semasa sidang akhbar sempena majlis penyerahan surat tawaran Sky Global Apprenticeship Programme kepada 20 mahasiswa di sini pada Selasa.

Pada Isnin, Pengerusi PAC, Datuk Mas Ermieyati Samsudin berkata, KPT disaran untuk mempertimbangkan pelaksanaan dan pemakaian Garis Panduan Pelaburan dan Pembiayaan oleh Universiti Awam 2024.

Garis panduan tersebut dilihat baik untuk digunapakai oleh universiti awam.

Sementara itu, mengulas mengenai Program Sky Global Apprenticeship, Zambry berkata, seramai 30 mahasiswa universiti tempatan terpilih untuk ke Ankara, Turkiye selama tiga minggu untuk didedahkan secara terus di dalam industri aeroangkasa.

"Ini selaras dengan dasar KPT iaitu pendekatan bukan hanya berdasarkan pembelajaran di kampus semata-mata," katanya.

Jelas beliau, inisiatif tersebut sebagai langkah mempersiapkan mahasiswa dalam menghadapi cabaran lebih luas dan terbuka kerana mereka memerlukan perspektif leboh global.

"Tempoh tiga minggu itu akan dikira sebagai jam kredit bagi subjek berkaitan," ujar Zambry.

Program Sky Global Apprenticeship merupakan salah satu inisiatif berimpak tinggi di bawah kerjasama antara Konsortium Universiti Malaysia (CMU), Malaysian Industry-Government Group for High Technology (MIGHT),

TUSAŞ Malaysia dan TUSAS Akademi (Turkiye) yang dimeterai pada 7 April tahun lalu.

Ia memberikan manfaat besar kepada negara dengan mengembangkan kemahiran kejuruteraan pelajar Malaysia melalui pengalaman kerja antarabangsa, meningkatkan kebolehpasaran graduan dalam industri aeroangkasa, membina jaringan profesional antara Malaysia dan Turkiye dalam sektor aeroangkasa.